

Dort steht a'h als d'r *Humbugs*-mann,
M'r meend bal alle Nacht;
Er greischt un sing'd, er brallt un liegd,
Bis er die Narre-crowd a'ziegd,
Un kauft bezahlt und lacht;
Un 's isch net noch so'n *Humbugs*-fair
Wie sel dort in dem *Center-Square*.

So hen m'r als die Schneegens g'fange
For alters, bei d'r Nacht;
M'r hen 'n bund'l schtro a'g'schteckt,
Un hen's mit Peint-holtz zugedeckt,
Un sell hot Helling g'macht,
Un hot die Schneegens so ferblennt,
Sie hen sich selwer net gekennt.

Es isch a' just about der Blatz
For'n wolfler Kalter *Check*:
M'r geht juscht zu d'r Sally Pud-
ing, sie ischt der Kerl for gute
Lewerwerscht un Weck.
Juscht huck dich hie und ess dich satt,
Im Marik-haus mittes in d'r Schtadt.

Dort war ah als die *Ewa* g'huckt,
Nau isch sie nimme do;
Du hoscht net weiter brauche suche,
Es war ken bessere Lebkuche—
Ich wees das sell war so;
Ken bessere Kuche an dem Marik,
Recht mittes do in unserer Schtadt.

Nau wan due wolfe Eischters gleichscht
Dan ruf emohl dort a';
Die Eishters schtarik an zehe Cent,
D'r Kaffee schwach an fuenf Cent—
Juscht guk emohl die Fraa'!
For fufzeh Cent essst sie sich satt,
Eischters un Kaffee, *schmoking hot*.

E' dehl Leut gehne in die Kerich,
Un fiel Leut gehne net;
Doch alle Leut gehn an der Marik,
Recht mittes do in unserer Schtadt—
So sagt als unser Kaet;
"Wer nix fom Marik hole kan
Der hot a'h nix for in the Pann."

D'r Marik wachst aus dem *Center-Square*
'S isch wunderbar, wie gross!
Wann juscht's alt Marik-haus wachse dhett,
As wie d'r Marik—so lang un breet,
Was waer's doch so karjoos!
Un's waer dorchaus die schoenschte *Affaire*
Das sei kaennt in dem *Center-Square*.

Doch isch net noch so'n schoe Gebei
In dere ganze Welt—
Net noch so'n Haus, *I will be bound*—
So'n schoene *open Front* all round,
Un koscht so wenig Geld;
Un's isch a'h unsere hoechschte Ehr—
Sel Marik-haus dort im *Center-Square*.

Es is ken Haus in dere Schtadt
Das besser ufbezahlt;
Es ish ken Shop un a'h ken Feld,
Ken Muehl in dere ganze Welt
Das meh Profit raus mahlt;
O! Court-haus, Poor-haus, Bressend, all,
Aus eich kummt kein Profit—net bal'.

E dehl Leut sage's soet dort weck,
Denkscht du ich schtimm dafor?
Es isch ken Baenk in dere Welt,
Das besser isch for *Cash*-Baargeld;
Un's helfst ah selle Schtoor
Wu business dhune schquare un fair,
So rings rum um den *Center-Square*.

Waer Heit die Wahl for geh? or schteh!
Wan ich's muesst Heit entscheide;
Mei Schtimm waer immer, loss es schteh,
Sel alt Marik-haus, ja, loss es schteh,
Ich kann ken anners leide;
Un wans ah waer mei letschtes Wort,
'S waer immer, immer, lass es dort.

Die Schtadt wu ken so Marik-haus hot,
Net besser g'schwindt en's gruege;
Die Schtadt wu dief in Schulde isch,
Un net fiel hot for uf d'r Disch,
Un a'h ken Rent zu ziege—
Jerusalem! du arme Schtadt!
Hoscht ken so Marik wie unsere g'hat.

Juscht denk e'mohl wie's gucke dhett
Wan's nimme dort dhett schteh!
So blut und lehr, so hell und klohr
Wie's Marik-haus alfort war dafor,
Un O! was dhett mei Herz so weh!
Un Fremde sage 's isch net arg,
Schunsch waer do in d'r mit d'r Marik.

Ich hab do jetz'n *Schtory* g'hoerd—
'Will hofte 's isch net wohr;
Sie woelles uf der Kerichhoof duh!
Am Gaense-hiwele drowe wu
En Kerichhoof war, die Johr;
Wan's wohr ish, sag ich, nem mei Wort,
Die Narre sin noch net all fort.